

Moemedi ya hlekelang o makgotleng a dinyewe ka lebaka la ho qhekanyetsa SARS le ba tlisang dithoto ka hare ho naha

Tshwane – 03 Phato 2022 - Ditshebeletso tsa Lekgetho tsa Afrika Borwa (SARS) di hlokometse ho hlahella ha moemedi ya hlekelang le ya qoswang mmoho le yena mane Lekgotleng la Ditlole tsa Molao tsa Kgwebo Durban ka la 28 Phupu 2022, mabapi le boqhekanyetsi ba tsa bolaodi ba meedi le tsa dihlahiswa tsa naha. Bobedi bona bo qoswa ka ho qhekanyetsa SARS le ditlalente tsa yona tjelele e fetang R2 million. Taba ena e fanyehilwe ho fihlela ka la 20 Mphalane 2022.

Jayson Perumal (43) wa Dynamic Freight le Reshlan Pillay (38) ba ile ba qoswa ka boqhekanyetsi mmoho le ditlole tse ding tse mabapi le ho se ikamahanye le Molao wa Bolaodi ba Meedi le Dihlahiswa tsa Naha. Baqosuwa bana ka bobedi ba bona ba ka ntle ka beile.

Reshlan Pillay, molaodi wa Potenza Capital, eo hape e leng moemedi ya hlekelang, o qoswa ka hore o sebetsane le tsa bolaodi ba meedi ka yona nako eo a neng a sebetsa mmoho le Jayson Perumal wa Dynamic Freight, eo ka nako eo a neng a emetse ba fapaneng ba tlisang dithoto ka hare ho naha. Ho bolelwa hore Potenza Capital e fane ka ditokomane tsa leshano ho SARS, moo boleng ba dithoto, le dithoto ka botsona mmoho le dintlha tsa ba tlisang dithoto ka hare ho naha di ileng tsa shanofatswa mme sena sa lebisa hore ba lefe dikgafa tse seng kae mmoho le VAT ho SARS.

SARS e hlokometse mofuta ona wa boqhekanyetsi mme e batla ho lemosa baemedi ba hlekelang hore ba tla tobana le pela di falla ho ya ka molao mohlang ba tshwarwang. Ka yona nako eo, SARS e lakatsa ho lemosa setjhaba, haholoholo ba tlisang dithoto ka hare ho naha, ho re ba dule ba fadimehile nakong eo ba saenang dikontraka le baemedi ba hlekelang. Ba lokela ho elellwa hore ho na le dikgafa tse nepahetseng mmoho le VAT e lokelang ho leshwa, le ho netefatsa hore bokaalo boo bo feela bo leshwa SARS. Ho latela Molao wa Bolaodi ba Meedi le Dihlahiswa tsa Naha, ya tlisang dithoto ka hare ho naha ke yena ya jarang boikarabelo ba tefo ya dikgafa le VAT ho SARS.

Ba tlisang dithoto ka hare ho naha ba lokela ho tsekella ho fumantshwa ditefo tse entsweng ho SARS, tse mabapi le dithoto dife kapa dife tse tlisitsweng ka hare ho naha, ho baemedi bana ba hlekelang. SARS e fumane hore ba bang ba baemedi ba hlekelang ha ba tsebahatse boleng ba dithoto ka boomo mme sena se bake tahlehelo ya palohare ya 90% ka lebaka la ditokomane tsa leshano tsa ho tlišwa ha dithoto ka hare ho naha. Le ha ho le jwalo, ho bolelwa hore ba etsa ditseko tse nepahetseng tsa dikgafa le VAT ho tswa ho ditlalente tsa bona, ha ka lehlakoreng le leng ba lefa SARS bonyenyane ba dikgafa le VAT. Baemedi bana ba hlekelang ba inkela tjelele e salang mme ka tsela eo ho be le dikgahla tse tlase bakeng sa ditshebeletso tsa bona, ha ka lehlakoreng le leng ba ntse ba qhekanyetsa SARS le ya tlisang dithoto ka hare ho naha.

Ya tlisang dithoto ka hare ho naha o lemala habedi ebang SARS e odita diphapanyetsano tsena mme e boele e kenye dilevi le bokaalo bo nepahetseng ba VAT le dikgafa tse lokelang ho leshwa ke ya tlisang dithoto ka hare ho naha. SARS e kgathatsehile ke bonamo ba sekema sena, ho na le diphuputso tse ntseng di tswela pele tse mabapi le dikema tsa mofuta ona tsa dimiliyone tsa diranta tse ntseng di tswela pele mane Gauteng le Western Cape.

Khomishenara ya SARS Edward Kieswetter o kgotsofaditswe ke "hore SARS e phethahatsa maikemisetso a yona a mawala a mokgatlo o ho thafalletsa le ho etsa hore ditjeo e be tse hodimo bakeng sa bao ba ikgethelang ho etsa diketso tsa bonokwane ha ba sebetsa le SARS". Le ha taba ena e sa ntse e le makgotleng a dinyewe mme e sa ntse e tla sekwasekwa,

o boletse hape hore "ho bohlokwa haholo hore bakgathatema kaofela ha bona ba sebetse ditaba ka bohlale le ka botshepehi ha ba sebetsa le SARS".

Ho fumana lesedi le fetang lena, ka kopo ikopanye le SARSMedia@sars.gov.za